

源度其地鳩其工諭其民咸樂之九年八月鑿冷泉故基
自文昌橋直抵南洲鋪上口凡九百七十餘丈接汝江皆沙
礫排室微有其址於是畚鍤旣備併其工而開鑿乃浚其湫
乃高其壩土與江口平盡出其沙與積壤縈束盤委望之若
帶焉過報恩寺趨文昌橋下透隴畝而分其溝塍綺錯鱗差
二十餘派陂堰五所以節水勢公又於其上橫截汝江置干
金陂南北百二十五丈斬木爲橦疊薪爲澮間以巨石而絡
之偶江水小長陂則蹙其水丈餘而入於冷泉之新渠奔流
貫激通舟楫之利於窮民走文昌橋北沿流三十餘里灌注
原田新舊共百有餘頃自茲田無荒者民悉力而開耕爾後
又不可勝紀其頃畝矣先時荒廢陂水不入仰天雨積潦而
漑之苟旱暵不雨苗則盡稿是臨汝長寧長樂三鄉之民固